

29. januar 2015

UPA 2015/23

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Allanut ajunngitsuliorneq inuiaqatigiinnik kivitseqataaneq, utertitsiffigineqarnissamik akissarsinissamilluunniit siunertaqanngitsoq, inooriaatsitsinni annertunerujussuarmik ileqquliuteqqittariaqarnerata qanoq iliornikkut aaqqissuussamik piviusunngortinneqarsinnaanera pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Vivian Motzfeldt, Siumut)

Tunngavilersuut:

Nunatsinni immitsinnut tamatta pisariaqartippugut, ikittunnguugattalu ikioqatigiilluartarnissarput pisariaqartuarpog, pisariaqartuassallunilu, pisinnaatitaaffiit pisussaafiillu malitsigiillutik ersarinnerusumik ingerlaqatigiittariaqarput.

Nunatsinni inuusuttut aaqqissuusamik inoqatiminnut ikiunneq annertunerujussuarmik pigiliussatut inuunerannut ilaanagerusariaqarpoq.

Qangaaniit siulitta nunami maani inuuginnarsinnaasimanerannut tunngavinnut annerpaanut ilaasoq tassaavoq ikioqatigiinneq, tamanillu sapinngisamik qaarsillartitsinissamik siunertaqartumik inooriaatsip aaqqissugaasimanera.

Nunatsinni oqaluttuarisaaneq kingumut qivialaassagaanni inooriaatsimik allannguinerit arlalippassuit piffissap ingerlanerani assigiinngitsorpassuarnik malitseqartitsisimavoq. Inooriaaserput ukiut arlaqanngitsunnguit kingumut utersaassagutta allanngornerpassuarnik aqqusaarsiffiuvoq. Tamatumallu aamma malitsigaa sammiviit, naleqartitat anguniakkallu allanngornerannik.

Nunarsuarmi nunat nunasseriaatsillu qiviassagaanni nunatsinni immikkorluinnaq ittumik inissisimavugut, tamakkulu aamma unammillernartorpassuarnik malitseqarput. Nunarujussuarmi ikittuinnaavugut siammasissumillu nunasseriaaseqarnitta ullutsinni inooriaaseq annertuunik unammillernartoqartippaa.

Ilinniarsimassutsitta qaffassartuarnissaa pingaarteqaarput, taamaammallu nunarpassuarnut allanut sanilliulluta ilinniartortagut atugassaqartinniarsaraavut pitsaasunik nunatta karsianit akilersukkatsinnik, tamannalu soorunami pissusissamisoorpoq taamaaasaarluk. Aaqqissuussalli iluani amigaatigisatut ujartugara tassaavoq,

perorsagaanermi tunngavik avaqqunneqarsinnaanngitsoq tassaasoq: Pisinnaatitaaffiit pisussaaffiillu malitsigiillutik ingerlaqatigiittussaanerat. Tamatumanilu inuusuttut ilinniartitaanerannut atasumik aaqqissuussamik inoqatinik ikiuinissamut inuiaqatigiinnilu inooqataaffigisamik kivitseqataanissamut periarfissaqartitaanissaat pissusissamisoorutut isigaara.

Nunarpassuit allat ilinniartitaanerup iluani aaqqissuussamik inuiaqatigiinnut ikiuineq kultooreraat pisussaaffinnullu ilinniarterup pingaaruteqarneratullu naammassisariaqartunut ilaatilluinnarlugu.

Takorloorsiuk ilinniartit piareersarfiusumik ingerlariaqqiffiusut tamarmik piumaffigineqartalertuuppata, ilinniartup atuarnermini skemamini akunnerit marluk inuiaqatigiinnut ikiuunnermut atortalertuuppasuk qanoq illoqarfinnut ataasiakkaanut uummarissaataatigisinnaanersoq qanorlu susassareqatigiinnerup iluani inerititaqarfiutigisinnaanersoq.

Namineq piumassutsimik aaqqissuussamik aaqqissuussinermi iluaqutissinneqarsinnaasut amerlaqaat, taassumap iluani takorloorneqarsinnaapput utoqqaat, innarluutillit, meeqqeriviit il.il Utoqqarpassuaqarpoq kiserliortunik suli nammineersinnaagaluarlutik immikkut ikiorteqarnissaminnut akissaalatsisunik, ikiuinerinnaq pinngikkaluarlugu peqateqarneq avitseqatigiinnerlu taassumap aamma iluaniippoq. Innarluutillit aliikkusersorneqarsinnaapput inuttullu allatut peqatigineqarlutik, meeqqerivinni aliikkusersuisoqarsinnaavoq sulisunullu tapertaalluni.

Aaqqissuussinerep inuit imminnut susassareqatigiinnerat annertuumik ikorfartussagaa qularutiginngilara, ikioqatigiinnermi nukittuunngortitsiarpoq inuttullu nukissanik aningaasap taarsersinnaanngisaannik pinngortitsisarlu. Taamak aaqqissuusineq ikiorserneqartup kisimi iluaqutiginavianngilaa, tamattami nalunngilarput allanut iluaqutaasinnaagaangatta inuttut annertuumik ineriartuutigisaripput.

Aningaasaqarnitta unammillernartumik killissimanagera tamatta ilisimaaraarput, nunarujussuarmilu siammasissumik nunasseriaaseqarnitta unammillernartut ikinnerulersinngilai. Oqallinnerit pitsanngorsaanerillu tamarmik qanoq aningaasalersorneqarnissaannik imaqartuarput.

Taamaamat Isumaqarpunga oqallisissiaq una piffissaminut naleqquttoq, kimulluunniimmi perorsaataallunilu peqqinnartuummat iluaqutaasinnaanermik atorfissaqartinneqarnermillu misigineq. Taamaamat siunnersuut immikkut aningaasaliiffiginngikkaluarlugu inuppasuarnut kalluaasinnaasoq ima ittoq saqqummiuppara, neriullunga apeqquteqaat aallaavigalugu oqallinnissamik siunnersuutigita partiinit naalakkersuisunillu tamanit soqutigineqarluni oqalliseqataaffigineqarumaartoq. Isummat oqariartuutillu suleriaqqinnissatsinnut tunngavissiisinnaasut pigilerniassagatsigik.

Erseqqissaassutigiumavara namminneq kajumissutsiminnik suliaqareersorpassuit uani pineqanngimmata, tamakkulu qujassutessaqarfioqimmata taamatullu ingerlatsinerat annertuumik nersortariaammata.

